

दिनांक : 17.04.2026

समय : 18.45 बजे

आकाशवाणी जयपुर-अजमेर  
प्रादेशिक समाचार

- लोकसभा मांय आज 131वां संविधान संशोधन बिल समेत तीन बिलां परां चर्चा जारी-सदन मांय आज ही आं बिलां माथे वोट पड़ेला।
- प्रदेश मांय जनगणना रा पहला दौर मांय 16 मई ऊं मकानां री लिस्ट बणावण रो काम सरू व्हेला-1 ऊं 15 मई ताई स्व-गणना करी जावेला।
- बैसाख महीना मांय ई प्रदेश मांय ज़ोरदार गर्मी-चूरू मांय पारो 43 डिग्री सेल्सियस दर्ज करी ज्यो।

अर

- जयपुर मांय आज राष्ट्रीय सहकार मसाला मेळो सरू व्ह्यो-राजस्थान समेत केई राज्यां रा सामान री स्टॉल्स लगायी ज्यी।

000

लोकसभा मांय संविधान रा 131वां संशोधन बिल 2026, परिसीमन बिल 2026 अर केंद्र शासित प्रदेश कानून संशोधन बिल 2026 माथे चर्चा चाल रही है। आं बिलां रो मकसद लोकसभा अर राज्यां अर केंद्र रा राज वाळा प्रदेशां री विधानसभावां मांय महिलावां री भागीदारी बधावणो है। चर्चा रे दौरान सदन मांय विपख रा नेता कांग्रेस रा सांसद राहुल गांधी कह्या के नारी शक्ति वंदन कानून महिला आरक्षण रो बिल नी है अर इण रो महिलावां ने मज़बूत बणावण ऊं कोई लेवणो-देवणो नी है। राहुल गांधी आं बिलां रे ज़रिये देश रो चुनावी नक्शो बदलण री कोशिश रो आरोप मांड्यो। जवाब मांय महिला अर बाल विकास मंत्री अन्नपूर्णा देवी कह्यो के महिलावां ने केवल देश रा विकास मांय भागीदार है, बल्कि देश रो भविष्य बणावण मांय ई खास काम कर रही है। वे बिल ने ऐतिहासिक उपलब्धि बताता थका कह्यो के ओ सगळां री भागीदारी वाळो राज अर महिलावां री अगुवाई मांय विकास रा भारत रा नज़रिया ने बतावे है।

प्रधानमंत्री नरेन्द्र मोदी सगळी सियासी पार्टियां ऊं महिला आरक्षण बिल री हिमायत मांय वोट देवण री अरज कीनी है। सोशल मीडिया पोस्ट रे ज़रिये वे कह्यो के देश री महिलावां ने संसद, वां रा इरादां अर फैसलां रो इंतज़ार है। लोकसभा मांय नारी शक्ति वंदन कानून पास व्हेवण ऊं पैली प्रदेश मांय महिलावां री ओर ऊं सकारात्मक प्रतिक्रिया मिल रही है। पाली रा तखतगढ़ री लक्ष्मी सीरवी आस जतायी के ओ कानून साल 2047 ताई विकसित भारत बणावण रो सपनो सांचो करण मांय खास काम करेला।

.....

000

प्रदेश मांय जनता री गिणती रा काम रो पहलो दौर 16 मई ऊं 14 जून बीचे व्हेला। ई दौरान जनगणना रा काम मांय लाग्योडा कर्मचारी घर-घर जा र मकानां री लिस्ट बणावेला। ई सागे ई मकान रा हालात, पिरवार कने मौजूद सुबीता अर माल-असबाब रा बारा मांय जाणकारी हासिल करी जावेला। जनगणना निदेशक बिष्णु चरण मलिक आज खबरनवीसां ने बतायो के 1 लाख 60 हजार प्रगणक अर सुपरवाइजर घर-घर जा र जाणकारी हासिल करेला। मलिक बतायो के सरकार पहली दफा स्व-गणना रो सुबीतो ई मुहैया करायो है। ई रा तैत 1 ऊं 15 मई बीचे जनता खुद ऑनलाइन पोर्टल रे ज़रिये जाणकारी दे सकेला।

वे जनता ऊं जनगणना अर स्व-गणना रा नाम ऊं व्हेवण वाळी साइबर धोखाधड़ी ऊं बचबा री अरज कीनी।

-----

000

प्रधानमंत्री नरेंद्र मोदी रा 21 अप्रैल ने पचपदरा रिफाइनरी री सरूआत करण रा कार्यक्रम री तैयारियां आखिरी दौर मांय पूग गयी है। आज बालोतरा रा ज़िला प्रभारी अर पशुपालन मंत्री जोराराम कुमावत कार्यक्रम री ठोड़ रो जायजो ले र व्यवस्थावां रा बारा मांय अहलकारां ने ज़रूरी हुकम दीना। दूजी कानी संसदीय कार्य मंत्री जोगाराम पटेल कह्यो है के पचपदरा मांय तेल साफ करण रो कारखानो प्रदेश रा औद्योगिक विकास सारु मज़बूत कड़ी साबित व्हेला। वे आज जोधपुर मांय जनसुणवाई पाछे खबरनवीसां सागे बातचीत कर रह्या हा। पटेल कह्यो के 21 अप्रैल ने प्रधानमंत्री नरेन्द्र मोदी रो बालोतरा मांय ई रिफाईनरी रो उदघाटन करण करण रो कार्यक्रम है। मंत्री कह्यो के ओ कारखाना चालू व्हे जावण ऊं लोगां ने नौकरी-धंधा रा मौका मिलेला अर प्रदेश री माली तरक्की मज़बूत व्हेला।

-----

000

आतूणी एशिया मांय चाल रह्या तणा-तणी रा हालात रे बावजूद देश मांय रसोई गैस री पूर्ति स्थिर बण्योड़ी है। नई दिल्ली मांय आज अंतर-मंत्रालय ब्रीफिंग रे दौरान पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा बतायो के देश मांय रसोई गैस री पूर्ति सामान्य है।

-----

राज्य मांय ई रसोई गैस री पूर्ति तैय करण सारु खान अर पेट्रोलियम विभाग री अतिरिक्त मुख्य सचिव अपर्णा अरोड़ा आज व्यवस्थावां रो जायजो लेवण बाबत् राज्य री न्यारी-न्यारी शहरी गैस वितरण संस्थावां रा नुमाइंदां सागे वर्चुअल तरीकां ऊं मीटिंग कीनी। वे बतायो के केन्द्र अर राज्य सरकार पीएनजी ऊं जुड़्या सुबीतां ने बधावण अर डीपीएनजी कनेक्शन जारी करण माथे ज़ोर दे रही है। अपर्णा अरोड़ा बतायो के लारला 15 दिन मांय 6 हजार ऊं बत्ता पिरवारां ने नुवा डीपीएनजी कनेक्शन जारी करी ज्या, जदके आवता 15 दिन मांय करीब साढे आठ हजार पिरवारां ने ओ सुबीतो दियो जावेला।

ई बीचे पश्चिम एशिया मांय झगड़ा री सरूआत पाछे ईरान ऊं भारत रा 2 हजार 361 जणां ने पाछो देश पूगा दिया ज्या है। विदेश मंत्रालय रा प्रवक्ता रणधीर जायसवाल आज नई दिल्ली मांय आ जाणकारी दीनी।

000

प्रदेश रा केई हलकां मांय पड़ रह्या ज़ोरदार तावड़ा रे कारण पारो 40 डिग्री सेल्सियस ने पार कर गयो है। आज चूरु मांय अधिकतम तापमान 43 डिग्री सेल्सियस रिकॉर्ड करी ज्यो। लारली रात केई ठोड़ां कम-ती कम तापमान 25 डिग्री सेल्सियस ऊं ऊंचो मापी

ज्यो । फलौदी मांय ई न्यूनतम तापमान 30 डिग्री सेल्सियस ने पार कर ग्यो । ई बीचे आज झुन्झुनू, श्रीगांगानगर, सीकर, अलवर अर कोटपूतली समेत केई जिलां मांय दोपहरां पाछे आंधी चालण अर कठे-कठे हल्की बारिष रा समाचार है । मौसम केन्द्र जयपुर आवता तीन-चार दिन मांय पारो और चढ़बा रा आसार जताया है ।

000

प्रदेश मांय आखा तीज अर पीपल पूण्यू रे मौके बाळक जोड़ां रा ब्याह री शंका ने ध्यान राखता थकां इण री रोकथाम सारु भांत-भांत री कोशिशं करी जा रही है । न्यारा-न्यारा कार्यक्रमां रे जरिये जनता ने बाळपणा मांय ब्याह रा गलत नतीजा रा बारा मांय जाणकारी दी जा रही है । ई सागे ई जिला स्तर माथे कंट्रोल रूम बणायी ज्या है, जठे बाळक जोड़ां रा ब्याह री खबर दी जा सके है । पाली रा बाल विवाह कंट्रोल रूम प्रभारी बालचंद चौहान जनता ऊं बाळक जोड़ां रा ब्याह रोकण मांय प्रशासन री मदद करण री अरज कीनी ।

-----

000

जयपुर मांय आज राष्ट्रीय सहकार मसाला मेळो सरु व्ह्यो । सहकारिता विभाग अर राजस्थान राज्य सहकारी उपभोक्ता संघ-कॉन्फेड री मदद ऊं जवाहर कला केन्द्र मांय लगाया जा रह्या ई मेळा मांय राजस्थान समेत न्यारा-न्यारा राज्यां री सहकारी संस्थावां रा मसालां अर दूजा सामान री बिक्री करी जा रही है । मेळा मांय लगायी जा रही स्टॉलां माथे काळीमिर्च, लोंग, तमिलनाडु री हल्दी, दालचीनी, आंध्रप्रदेश री लालमिर्च, कश्मीर रा मेवा, केसर अर मध्यप्रदेश रा सिहोरी गेहूं री खरीदी करी जा सके है ।

ई सागे ई मेळा मांय मथानिया री लालमिर्च, रामगंज मंडी अर बारां रो धणियो, नागौर रो जीरो अर कसूरी मैथी, सिरोंही री सौंफ, प्रतापगढ री हींग, चित्तौड़गढ री अजवाइन अर पुष्कर रा गुलकन्द समेत खाण-पीण री भांत-भांत री चीजां मिल रही है ।

000

सलूंबर जिला मांय आज 'मेरा विद्यालय, मेरा स्वाभिमान' अभियान सरु करी ज्यो । अखिल भारतीय राष्ट्रीय शैक्षिक महासंघ री ओर ऊं चलाया जा रह्या ई अभियान रो मकसद भणार्ई-लिखाई री गुणवत्ता अर शिक्षकां रो मान बधावणो है । कार्यक्रम रा तैत शैक्षिक महासंघ रा नुमाइंदा न्यारी-न्यारी सरकारी स्कूलां मांय जा र शिक्षकां अर प्रधानाचार्यां सागे भणार्ई-लिखाई ऊं जुड़ी व्यवस्था, समस्यावां अर सुधारां रा बारा मांय चर्चा कीनी ।

000

प्रधानमंत्री नरेन्द्र मोदी 26 अप्रैल दीतवार ने आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेला । आ हर महीना प्रसारित कर्या जावण वाळा ई कार्यक्रम री 133वीं कड़ी व्हेला । ई सारु आप ई 24 अप्रैल ताई मुफ्त नम्बर 1800-11-7800 माथे राय भेज सको हो । ई सागे ई नरेन्द्र मोदी एप अर माय जीओवी ओपन फोरम रे जरिए ई विचार भेज्या जा सके है ।

000